

八代诗

漢第一

八代詩選三

五言第一

長沙湘潭王闓運撰

枚乘

詩九首

西北有高樓上與浮雲齊交疏結綺窗阿閣三重階上有
絃歌聲音響一何悲誰能爲此曲無乃杞梁妻清商隨風
發中曲正徘徊一彈再三歎慷慨有餘哀不惜歌者苦但
傷知音稀願爲雙鴻鵠奮翅起高飛

東城高且長逶迤自相屬迴風動地起秋草萋已綠四時
更變化歲暮一何速晨風懷苦心蟋蟀傷局促蕩滌放情

志何爲自結束燕趙多佳人美者顏如玉被服羅裳衣當
戶理清曲音響一何悲絃急知柱促馳情整巾帶沈吟聊
躑躅思爲雙飛燕銜泥巢君屋

行行重行行與君生別離相去萬餘里各在天一涯道路
阻且長會面安可知胡馬依北風越鳥巢南枝相去日已
遠衣帶日已緩浮雲蔽白日游子不顧返思君令人老歲
月忽已晚棄捐勿復道努力加餐飯

涉江采芙蓉蘭澤多芳草采之欲遺誰所思在遠道還顧
望舊鄉長路漫浩浩同心而離居憂傷以終老

青青河畔草鬱鬱園中柳盈盈樓上女皎皎當窗牖娥娥

紅粉粧纖纖出素手昔爲倡家女今爲蕩子婦蕩子行不
歸空牀難獨守

蘭若生春陽涉冬猶盛滋願言追昔愛情款感四時美人
在雲端天路隔無期夜光照玄陰長歎念所思誰謂我無
憂積念發狂癡

庭中有奇樹綠葉發華滋攀條折其榮將以遺所思馨香
盈懷袖路遠莫致之此物何足貴但感別經時

迢迢牽牛星皎皎河漢女纖纖擢素手札札弄機杼終日
不成章泣涕零如雨河漢清且淺相去復幾許盈盈一水
間脈脈不得語

明月何皎皎照我羅牀幃憂愁不能寐攬衣起徘徊客行
雖云樂不如早旋歸出戶獨彷徨愁思當告誰引領還入
房淚下沾裳衣

蘇武

詩四首

結髮爲夫妻恩愛兩不疑歡娛在今夕燕婉及良時征夫
懷往路起視夜何其參辰皆已沒去去從此辭行役在戰
場相見未有期握手一長歎淚爲生別滋努力愛春華莫
忘歡樂時生當復來歸死當長相思

骨肉緣枝葉結交亦相因四海皆兄弟誰爲行路人況我

連枝樹與子同一身昔爲鴛與鴦今爲參與辰昔者長相近邈若胡與秦惟念當乖離恩情日以新鹿鳴思野草可以喻嘉賓我有一尊酒欲以贈遠人願子留斟酌敘此平生親

黃鵠一遠別千里顧徘徊胡馬失其羣思心常依依何況雙飛龍羽翼臨當乖幸有絃歌曲可以喻中懷請爲游子唸泠泠一何悲絲竹厲清聲慷慨有餘哀長歌正激烈中心愴以摧欲展清商曲念子不得歸俛仰內傷心淚下不可揮願爲雙黃鵠送子俱遠飛

燭燭晨明月馥馥秋蘭芳芬馨良夜發隨風聞我堂征夫

懷遠路游子戀故鄉寒冬十二月晨起踐嚴霜俯觀江漢
流仰視浮雲翔良友遠別離各在天一方山海隔中州相
去悠且長嘉會難再遇歡樂殊未央願君崇令德隨時愛
景光

李陵

與蘇武詩三首

良時不再至離別在須臾屏營衢路側執手野踟躕仰視
浮雲馳奄忽互相踰風波一失所各在天一隅長當從此
別且復立斯須欲因晨風發送予以賤軀

攜手上河梁游子暮何之徘徊蹊路側悵悵不能辭行人

難久留各言長
相思安知非日月
弦望自一時
努力崇明德
皓首以爲期

嘉會難再遇
三載爲千秋
臨河濯長纓
念子悵悠悠
遠望悲風至
對酒不能酬
行人懷往路
何以慰我愁
獨有盈觴酒
與子結綢繆

班婕妤

怨歌行

新裂齊紈素
皎潔如霜雪
裁成合歡扇
團團似明月
出入君懷袖
動搖微風發
常恐秋節至
涼飈奪炎熱
棄捐篋笥中
恩情中道絕

班固

詠史詩

三王德彌薄惟後用肉刑太倉令有罪就逮長安城自恨
身無子困急獨熒熒小女痛父言死者不可生上書詣闕
下思古歌雞鳴憂心摧折裂晨風揚激聲聖漢孝文帝惻
然感至情百男何憤憤不如一緹縈

張衡

同聲歌

邂逅承際會得充君後房情好新交接恐慄若探湯不才
勉自竭賤妾職所當綢繆主中饋奉禮助烝嘗思爲莞蒨

席在下蔽匡牀願爲羅衾幃在上衛風霜灑埽清枕席鞮
芬以狄香重戶結金扃高下華鐙光衣解巾粉御列圖陳
枕張素女爲我師儀態盈萬方眾夫所希見天老教軒皇
樂莫斯夜樂沒齒焉可忘

傅毅

詩一首

冉冉孤生竹結根泰山阿與君爲新昏兔絲附女蘿兔絲
生有時夫婦會有宜千里遠結昏悠悠隔山陂思君令人
老軒車來何遲傷彼蘭蕙花含英揚光輝過時而不采將
隨秋草萎君亮執高節賤妾亦何爲

無名人

古詩十首

青青陵上陌磊磊澗中石人生天地間忽如遠行客斗酒
相娛樂聊厚不爲薄驅車策駑馬遊戲宛與洛洛中何鬱
鬱冠帶自相索長衢羅夾巷王侯多第宅兩宮遙相望雙
闕百餘尺極宴娛心意戚戚何所迫

今日良宴會歡樂難具陳彈箏奮逸響新聲妙入神令德
唱高言識曲聽其真齊心同所願含意俱未伸人生寄一
世奄忽若飈塵何不策高足先據要路津無爲守窮賤軼
軻長苦辛

明月皎夜光促織鳴東壁玉衡指孟冬眾星何歷歷白露
霑野草時節忽復易秋蟬鳴樹間立鳥逝安適昔我同門
友高舉振六翮不念攜手好棄我如遺跡南箕北有斗牽
牛不負輓良無盤石固虛名復何益

迴車駕言邁悠悠涉長道四顧何茫茫東風搖百草所遇
無故物焉得不速老盛衰各有時立身苦不早人生非金
石豈能長壽考奄忽隨物化榮名以爲寶

驅車上東門遙望郭北墓白楊何蕭蕭松柏夾廣路下有
陳死人杳杳卽長暮潛寐黃泉下千載永不寤浩浩陰陽
移年命如朝露人生忽如寄壽無金石固萬歲更相送賢

聖莫能度服食求神仙多爲藥所誤不如飲美酒被服紬
與素

去者日以疏來者日以親出郭門直視但見丘與墳古墓
犁爲田松柏摧爲薪白楊多悲風蕭蕭愁殺人思還故里
間欲歸道無因

生年不滿百常懷千歲憂晝短苦夜長何不秉燭游爲樂
當及時何能待來茲愚者愛惜費但爲後世嗤仙人王子
喬難可與等期

凜凜歲云暮螻蛄夕鳴悲涼風率已厲游子寒無衣錦裘
遺洛浦同袍與我違獨宿累長夜夢想見容輝良人惟古

歡枉駕惠前綬願得常巧笑攜手同車歸既來不須與又
不處重闈亮無晨風翼焉能凌風飛盼睠以適意引領遙
相睎徙倚懷感傷垂涕沾雙扉

孟冬寒氣至北風何慘慄愁多知夜長仰觀眾星列三五
明月滿四五蟾兔缺客從遠方來遺我一書札上言長相
思下言久離別置書懷袖中三歲字不滅一心抱區區懼
君不識察

客從遠方來遺我一端綺相去萬餘里故人心尙爾文采
雙鴛鴦裁爲合歡被著以長相思緣以結不解以膠投漆
中誰能別離此

擬李陵詩八首

有鳥西南飛，熠熠似蒼鷹。朝發天北隅，暮聞日南陵。欲寄一言去，託之牋綵繒。因風附輕翼，以遺心蘊蒸。鳥辭路悠長，羽翼不能勝。意欲從鳥逝，驚馬不可乘。

爍爍三星列，拳拳月初生。寒涼應節至，蟋蟀夜悲鳴。晨風動喬木，枝葉日夜零。游子暮思歸，塞耳不能聽。遠望正蕭條，百里無人聲。豺狼鳴後園，虎豹步前庭。遠處天一隅，苦困獨零丁。親人隨風散，歷歷如流星。三萍離不結，思心獨屏營。願得萱草枝，以解饑渴情。

寂寂君子坐，奕奕合眾芳。溫聲何穆穆，因風動馨香。清言

振東序良時著西庠乃命絲竹音列席會高唱悲意何慷
慨清歌正激揚長哀發華屋四坐莫不傷

晨風鳴北林熠熠東南飛願言所相思日暮不垂帷明月
照高樓想見餘光輝立鳥夜過庭髣髴能復飛褰裳路踟
躕彷徨不能歸浮雲日千里安知我心悲思得瓊樹枝以
解長渴饑

陟彼南山隅送子淇水陽爾行西南游我獨東北翔轅馬
顧悲鳴五步一旁皇雙鳧相背飛相遠日已長遠望雲中
路想見來圭璋萬里遙相思何益心獨傷隨時愛景曜願
言莫相忘

鍾子歌南音仲尼歎歸與戎馬悲邊鳴游子戀故廬陽鳥
歸飛雲蛟龍樂潛居人生一世間貴與願同俱身無四凶
罪何爲天一隅與其苦筋力必欲榮薄軀不如及清時策
名於天衢

鳳皇鳴高岡有翼不好飛安知鳳皇德貴其來見稀

闕

紅

塵蔽天地白日何冥冥微陰盛殺氣淒風從此興招搖西
北指天漢東南傾嗟爾窮廬子獨行如履冰短褐中無緒
帶斷續以繩瀉水置瓶中焉辨淄與澠巢父不洗耳後世
有何稱

擬蘇武答李陵詩二首